



# LA PATRIE DAL FRIUL

## SFUEI MENSÎL INDIPENDENT

Direzion e Aministrazion - Udine - via del Cotonificio 129

Tassa pagata / Taxe perçue Udine Italy - mensile / mensil spedizion in abonament postâl Poste italiane s.p.a.

### LINT AUTONOMISTE



## La storie o sin nô, no un concerti o il zâr di Italie

Dree Valcic

❖❖ O sin aromai intal plen dai events uficiâi che a ricuardin il taramot dal 1976 e za cualchi conclusion su cemût che si è volût celebrâ il 50m aniversari di chê date o podin metile neri su blanc. Prin di dut, no falavin nô e tancj altris che a pensavin che e sarès stade une enfatizazion dal rûl dai Stâts e dai siei aparâts sedi civîl che militârs. No falavin nancje cuant che o segnavin la Regjon - cu la sô sigle "Fvj" dominante su ogni acjadiment-disintchesisarès intestade la paternitât di une ricostruzion, e duncje de sô imagjin e des caracteristichis unitariis che la zonte di vuê si sint erêt. Une ereditât che invezit no corispuint ni aes caracteristichis politichis di chê epoche, ni ai valôrs che a costituivin la sô base ideâl. Intal memento imediât e sucessif al disastri, nancje la zonte di chê volte, vuidade di Comelli, e jere stade ae altece de situazion, ma bisugne ricognossii che e à savût dopo, cualchi volte adantansi a cualchi brut tîr, contentant lis justis domandadis che a vignivin dal bas, de organizazion des tendopolis, de riscuvierte di une cussience comunitarie e identitarie antighe, tacant un cjamin di colaborazion cun chei sindics che a son diventâts la anime fuarte e mestre de rinassite.

❖❖ O vevin reson cuant che o domandavin che lis manifestazions par chest cincuantenari no diventassin une scjate vueide, jemplade di avigniments efimars, cuant che o pretindevin che un ricuart dovût aes vitimis no si trasformàs in spettacul e vonde, e che no bastàs la presince dal cjâf dal Stât a

(al va indenand a pagj. 2) ▶



### EDITORIÂL

## AI FURLANS CHE A CRODIN

Walter Tomada

A 6 di Mai dal 1976 il Friul al vignive sdrumât dal taramot e 50 agns daspò i furlans no dismentein chei moments e ducj chei che nus àn judât. 990 muarts, 2607 ferits, 18 mil cjasis devastadis e 75 mil inabitabilis: a son chescj i numars che a van tramandâts di gjenerazion in gjenerazion par fâ capî a chei che a vignaran ce che "di scjas in scjas" la nestre tiere nus puarte cuntune frequence medie - nancje a fâ di pueste - propit di 50 agns.

◆ Nuie pôre. In chê volte la ricostruzion e à fat tant par ridusi l'impad de sismicitàt: ma il lavôr di adeguament nol finis mai e tantis robis a vegnin dadis par scontadis. Cun di plui, ancje la Protezion Civîl, che e je la ereditât principâl di chei timps difici, nus jude a pensâ di jessi sigûrs. Il fat al è che al taramot si zontin altris menacis de nature, dai slacs aes diluvions che il cambiament dal clime si mene daûr. De tampieste di Vaia a chê di Morteau, de aluvion di Viarse ai slacs di Breçan, ancje tal gnûf milenari o vin viodût che no podin stâ mai sigûrs.

◆ Ealore, ce fâ? Al sarès di lavorâ su la prevenzion, prin di dut: ma al è un lavôr che, se si vûl che al resti, al passe simpri pal recupar de memorie e dal sens di identitât. A son dimension necessaris par

frontâ il presint e l'avignî, e su chest noaltris de Patrie o cirî di tignî dûr, come che i nestris vons a àn tignût dûr tes disgraciis che la Storie ur à metût davanti.

◆ Par no pierdi la memorie di cui che al à indreçade la ricostruzion 50 agns indaûr, o vin volût meti in pits un ricuart dal moment forsît plui significatîf di chê rinassite. Ducj a ricuardin il sproc "*Prima le fabbriche, poi le case, poi le chiese*": e tancj sal intestin come se al fos stât inventât di lôr. Lis cjartis a disin invezit che i paris di cheste formulazion a son i predis di Glesie Furlane. Ai 9 di Mai, trê dis dopo dal scjas, si derin dongje e a scriverin un document indreçât "Ai Furlans che a crodin": doi dis dopo lu presentarin al Vescul Battisti, e a ducj i predis de Diocesi. Il rest al è storie: il Vescul lu

à fat so e chel test, jessût su "La Vita Cattolica" ai 22 di Mai, al è diventât il prin modon de ricostruzion.

◆ Al diseve che il popul furlan "nol domande ni compassion ni limuesine. Al crôt di vè dirit a un tratament compagn di chei altris di bande dal Stât" ma ancje di podê "sielzi e decidi di bessôi cemût ricostruî la nestre tiere su la fonde di une esperience di popul madressude intai secui". Al auspicave la union dai Partîts e al domandave di doprâ lis casermis par dâ un tet a cui che no lu veve plui. Soredut, al diseve che il prin pont de rinassite al jere dâ puescj di vore ai furlans intai lôr país par no favorî une gnove emigrazion. Dopo si veve di pensâ a dâur une cjase a ducj, e dome intun secont moment al coventave tornâ a tirâ sù lis glesiis, "libris vierts su la

nestre storie". L'ultin pont, che no si ricuarde mai, al jere che za in chel document si pensave ae Universitât, che e je diventade dopo dal taramot une bataie identitarie. Se la int e à tacât a tirâ sù firmis sot des tendis al è parcè che la Glesie e à poiât chê lote.

◆ Par memoreâ chel moment straordinari dulà che la Glesie Furlane e je stade tant profetiche e visionarie, o vin inmaneât inte Glesie di Sante Marie sul Cjistiell di Udin une Messe propit ai 11 di Mai e il vescul di Udin bonsignôr Riccardo Lamba al à volût jessi cun nô, propit par ricognossi la fuarce che i predis di chê volte a verin tal cjâlâ indenand e tal no tirâsi indaûr rispîet ae lôr mission. Par nô al è un onôr.

◆ Magari cussì no, a chel apontament nol pues jessi presint pre Tonin Cjapielâr, colone di Glesie Furlane e de "Patrie", che nus à lassâts il prin di Avrîl. La sô firme su chestis pagjinis e jere garanzie di une leture profonde de realtât, la sô peraule pe nestre redazion e jere simpri risultive di determinazion intal difindi la identitât dai vons. Al à dade la sô vite "Ai Furlans che a crodin" intun avignî dulà che la identitât cristiane e furlane di cheste tiere no sedi bandonade. Ancje se no tu sês plui cun nô, la tô ispirazion no vignarà pierdude. Cungjò, pre Tonin. ■

## LA PATRIE DAL FRIUL LIS NESTRIS PUBLICAZIONS



I libris si puedin cjatâ a Udin li des librarîis Tarantola, Moderna e Copia&Incolla ai Riçs o vè cuntune mail a [info@lapatriedalFriul.org](mailto:info@lapatriedalFriul.org)

COROT PAR PRE TONIN CJAPELÂR (1940-2026)

## Mandi pre Tonin, vôs sclete di une Glesie Furlane che e va incuintri a la int

pre Romano Michelotti



**T**onin, cjâr amî, o miôr, cjâr fradi, tu nus âs lassâts cussî di corse che o sin ducj restâts sconsortâts.

◆ In chescj dis tal gno cjâf mi son passâts di un continui come tun film ducj i agns che o vin passât insiem. Scomençant dai prins agns '70 che si cjatavin ogni lunis cuntun trop di predis a Vasinis cun pre Pauli e po, dopo dal taramot, li di te, stant che la cjase dulà che tu jeris a stâ cun tû mari Irme a Glemone e jere restade impins.

◆ Ocasions splendidis par cjatâsi a preâ, confrontâsi, sbrocâsi, solevâsi, discuti, e ancje a fâ cualchi bieie ridade liberant e po ripartî cun plui passion e vigôr. A son stâts agns fundamentâi che nus àn judâts ducj nô a tignisi sù l'un cul altri e a fâ miôr i predis cu la nestre int.

◆ Dai agns '80 par passe 30 agns si cjatavin ogni dì a mangjâ insiem a Ruvigne cun Rose prime e cun Bruna dopo. Ocasions par fevelâsi, confrontâsi, confidâsi, judâsi, progjetâ e ancje lavorâ. Dute la Bibie tacade di pre Checo e puartade indenand di pre Antoni, de edizion Ribis prime e de Diocesi dopo, le vin passade fûr par fûr plui voltis, e compagn cul Messâl. Simpri cul fin di dâ ae nestre Glesie i struments pe preiere te nestre lenghe, par rindi tant la peraule di Diu che la liturgjie cul savôr plui familiâr e plui incjarnadis te vite des nestris comunitâts. E lu vin fat cun passion e cul gust di puartâ indenand voris che o ritignivin

impuartantis, necessariis pes Glesiis in Friûl. Se nol jere chest grup, spes criticât e cjalât cun suspriet, sigûr no varessin la Bibie par furlan e nol sarès mai nassût il Messâl.

◆ Tonin, ancje a ti come a pre Checo, pre Antoni, pre 'Sef e altris, tant che Mosè che al veve compagnât il popul viers le tiere prometude e nol è rivât a jentrâ, ma dome a cjalâl de lontan, cussî nancje a voaltris, cun tant che o vês fat, no sês rivâts a cjapâ in man il Messâl. Lu stin spietant ancjemò. Cuissâ se mi tocjarâ ancje a mi il stes destin.

Ancje in chescj ultins agns si sintivin dispès par confidâsi i nestris pinsîrs e par dividî ce che o stevin fasint.

◆ Tonin, tu sês lât cussî di corse che no vin podût nancje stâti dongje intai ultins moments di vite.

◆ Graciis, Tonin, de tû amicizie sclete, de tû umanitàt genuine, de tû passion pal Vanzeli, pe int, pe comunitât cristiane, pal impegn in Glesie Furlane, graciis de tû sapience, de tû sensibilitât par cui che al veve plui dibisugne: malâts, anziani, disabii. No si pues dismenteâ che a Pignan tu âs fondât insiem cun Sergio il Samaritan par dâur bon acet, afiet e sigurece ai disabii e par che a podessin sintîsi come in famee. Tu nus lassis une bieie ereditât di vite, di sapience, di fede, di amôr pal popul furlan e pal popul di Diu. Mandi, mandî, Tonin, sta cun Diu e pree ancje tu par nô. ■

**L**a avualance di gjenar in Italie e à vût un viaç lunc e imberdeât. Fin al secul XX i dirits des feminis a son stâts scjars. Dome tal 1946 a àn podût votâ e tal 1948 la Costituzion e à fissât, in mût uficiâl, i dirits compagns dai oms.

◆ Riformis impuartantis a son diventadis decisivis dome decenis indenand. La leç sul divorzi (1970), la legalizazion de contracezion e dal abort – la protezion de maternitàt (1971), la revision de leç su la famee cu la sopression de autoritàt coniugâl dal om – stes dirits par formazion e lavôr (1975). Di no crodi che il matrimoni riparadôr e il delit di onôr a sedin stâts scancelâts dome intal 1981.

Dal 2001 indenand, biadelore, ancje i paris a puedin cjapâ permès par stâ daûr ai fis piçui.

In dut câs, il ricognossiment legâl nol à parât vie in automatic lis disparitâts culturâls e economicis. Di fat, tal 2024 in Italie il nivel de ocupazion feminine (15-64 agns) al è stât dal 54%. In Friûl -Vignesie Julie 64%; miôr, ma ancjemò distant de medie europeane dal 71% (dâts ISTAT).

◆ Meti sù famee al manten valôr positif, ma al mostre dispès une distribuzion sbaliade dai rûi. Ancje se a lavorin, in maniere implicite si spietisi des feminis che a puartin indenand la cjase e la cure dai parinçj. Di medie, cinc oris in di (cence jessi paiadis) cuintri lis dôs dai oms. Cheste asimetrie, unide a un welfare no suficient o masse cjâr in merit di asii e ricovars pai vecjos, lis oblee dispès a sielzi jenfri lâ a vore e viodi de famee. Une cjame di cheste fate e segne in maniere pesante oportunitâts di lavôr e cariere. Cun di plui, il divari salariâl e i contrats a timp parziâl imponûts dispès dai datôrs di lavôr a pesin un grum.

◆ Altri aspriet culturâl che al salte fûr dai modei sociâi mufulîts al è chel dai stereotips di gjenar che a condizionin lis frutis za de infanzie. Come se nol bastàs, ancje inte istruzion superiôr lis fantatis a vegnin discjoltis dai studis sientifichis e tecnologjics che a dan, e a daran, pussibilitâts di lavôr e cariere in setôrs strategjics. Par di plui, in gjenerâl in di di vuê lacès a puescj di lavôr di nivel alt al reste misurât pes feminis.

GLOSSARI

## Avualance di gjenar jenfri culture e dirits

Lorena Durisotti



◆ Tra i tancj aspriets economics, la avualance di gjenar e influence ancje il PIL che al mostre ben la ricjece di un Stât; la Bancje di Italie e stime che se il lavôr des feminis al fos ai nivei di chel masculin (72% intal 2024) al cressarès, su par jù, dal 7%.

◆ Tra lis manifestazions plui gravis de disparitàt e je le "violence di gjenar". La cuistion e je critiche e lis leçs no fasin avonde; al covente un cambiament culturâl radicâl. Lis

denunziis aumentadis a rimarchin che l'afâr al è seri; dibon, e je cressude la tindince a segnalâ i câs.

◆ La avualance di gjenar in Italie e je duncje une disfide tra tradizions ledrosis e afermazion des identitâts. No dome une cuistion di justizie, ma ancje di respriet, libertât di sielte e disvilup personâi e sociâi. Impegninsi ducj a discuti dal teme cun fruts, amis e coleghis stant atents, cun di plui, al lengaç che o doprin. ■


GNOVIS

## In linie su Teche Udine "La Patrje Ladine" di Tellini

Alessio Ecoretti

**A**l è un plasè comunicâ che, biadelore, tal sît di Teche Udine si pues cjatâ alc dal monumentâl lavôr di Achille Tellini, "apuestul" de nazion furlane che al à colaborât ancje cun Felix Marchi, fondadôr cun Marchet de Patrie dal Friûl. A son numars dal periodic ciclostilât "La Patrje Ladine" (no ducj, ma a

son numars une vore interessants dal 1921, 1923 e 1927), dulà che l'inteluetuâl furlan al pandeve la só concezion panladine, esperantiste e pacifiste dal Friûl. Si spere inte digjitalizazion di dutis lis sôs voris e, ancjemò di plui, te stampe di ducj i sei scrits, ancjemò in di di vuê bogns di pandi une concezion diferente dal Friûl e de furlanetât. ■



LA PATRIE LADINE

## EDITORIÁL

(al va indenant de prime pagjine)

## La storie o sin nô, no un concerti o il zîr di Italie

Dree Valcic

significâ il ricognossiment a chei che si àn batût in chei agns par che dut al tornàs "cemût che al jere e dulà che al jere".

\*\*\* Ve, o partirès propit di cheste peraule di ordin de nestre int par smitizâ la conte che vuê che o sin vitimis: nissun nol à di dismenteâ cemût che intai dis dopo de devastazion, su chel elicotar des autoritâts che al jere daûr a svolâ sore des areis taramotadis, e someave za cjapade la decision di fâ vanzâ lis pacaris sui nestris paîs. Si pensave ae ricostruzion dilunc de Pontebane, a une "deportazion" des popolazions da pît des monts fint ae Cjargne. Ve il model Friûl che a jerin daûr a sielzi, un progjet blocât de popolazion.

\*\*\* Insume, o disin la veretât – al scriveve Mauro Tosoni, diretôr dal giornâl "In Uaite" e partevôs des tendopolis dopo la manifestazion dai 5000 taramotâts dai 7 di Zenâr dal 1978 a Udin. – Nus àn ridusûts a fâ une bataie di difese, a lâ jù in place no pe ricostruzion, ma pes jentradis de ricostruzion. A domandâ bêçs inte sperance che no si fermin ducj intes borsis dal clientelism e dal nudriment des impresis, cuant che invezit o varessin vût di dedicâ lis nestris energjii fisichis e inteletuâls a decidi la cualitât de ricostruzion, par miorâ in plui che par ricostruî. No come prime, al jere stât dit daurman dopo il taramot. Cumò, a planc – al leve indevant Mauro – si stin usant ae idee che e sarà za tant se o rivarî a jessi come prime. E je une logjiche che e covente crevâ se no volin jessi cjapâts sot. Une vie di jessude e je ancjemò pussibile, ma dome se i furlans che no vignaran comprâts dal clientelism, la grande maiorance, a savaran unîsi e mostrâ la muse".

\*\*\* Cheste e je la storie vere, no il concerti di Bocelli. ■

## INT DI CJARGNE

## Aziende Lorenzini a Raviei, dulà che a cressin lis vacjis highlander

Marta Vezzi



Tal biel comun di Raviei, in vie Doman (za il non al promet ben) al numar civic 5/A si cjate la sede de ativitât dal zovin Sergio Lorenzini.

◆ "La stale achì in paîs le veve fate gno nono insiem a gno pari e ai miei barbîs, – al conte Sergio – dopo di gno nono e je stade puartade indevant di gno barbe e a àn simpri vût vacjis di lat, rivant a vënt ancje 40. Cualchi an indaûr

gno barbe al è mancjât, lui intant al jere lât in pension e al pensave che dopo di lui nissun al varès fat nuie altri, e mi à lassât a mi la stale cun dute la sò robe.

◆ Di cuant che o soi nassût o soi simpri lât te stale, prime cun gno nono, dopo cun gno barbe e gno pari e o ai propit vivût chest ambient; la mè cjase e jere dongje e par chest o stavi pôc a lâ inte stale. O lavi simpri cuant che o podevi:

dopo di scuele, di Istât, sabidis e domenîs.

◆ Finide la scuele o ai començât a lavorâ ma mi displaseve lassâ dut bandonât cussì. Vint passion dal mont dai arlevadôrs, mi soi informât su ce bestiis cjoli par che a fossin facilis di gjesti e o ai cjatât chestis vacjis highlander scozesis. O sei lât in Trentin dal prin arlevadôr in Italie che lis à tignudis e lis cognòs benon, o ai zirât un pôc e o soi tornât li di lui par comprâi lis primis trê. O soi lât indevant cussì un pôcs di agns e a son diventadis grandis. O ai clamât il fecondadôr artificîal par començâ a vè cualchi vidiel e chês 3 a son diventadis 5 feminis. A un ciert pont o ai decidût par semplicitât di comprâ il taur. Cumò ogni an cun lui o ai nassitis (cirche 4 vidiei ad an).

◆ A son cuasi 10 agns che o ai rivât la ativitât. Plui che altri o cîr di cjatâ di vendi i vidiei ancje se nol è sempliç. O ai provât a macelâ cualchi bestie e in famee la cjar e je stade preseade di ducj. Cumò o stoi lavorant par podè un doman vendi la cjar. O stoi preparant une stanzie par che e diventi un laboratori di lavorazion.

◆ Sergio al è un zovin motivât e la sò passion lu à puartât tal mès di Setembar dal an passât a molâ il so lavôr fis (impleât intune aziende a Damâr) par dedicâsi dal dut a cheste ativitât.

"Inte zone – al continue – o soi l'unic che al à cheste cualitât di vacjis. Che o sepi jo a 'nd jere un altri intun paisut dongje Davâr ma

no lis à plui e dopo al jere alc vie par Pontebe. Il lavôr plui grant al è fâ il fen. Par fortune ogni an o rivi a fâ alc di plui che o pues ancje a vendi par vè cussì cualchi jentrade.

◆ Dopo o scuèn stâ daûr a fâ lis spaltadis. Di Invier lôr a stan intun sierai plui piçul tor ator de stale dulà che a son lis puartis viertis e a puedin jentrâ e jessi cemût che a vuelin e dentri ur doi di mangjâ. Dal mès di Jugn lis meni in doi terens centâts plui grancj achì dongje a 4-5 km. O 'cjamin la mont' in piçul. Cumò a tachin a jessi 16 animâi e pes nassitis mi dan une man gno pari e cualchi amî. I miei fis a son contents di jessi presints a chest event.

◆ Lis vacjis a son tant buinis ancje se a àn i cuars bocons. Tra di lôr e je une cierte jerarchie: e je chê che e vûl stâ simpri devant, chê che e vûl mangjâ par prime e v.i.

Dal gno lavôr di impleât mi è vignût bon il savè doprâ il computer pe part burocratiche. Il probleme al è che tu rivis strac di sere e tu volaressis dome sierâ i voi, ma tu às di metiti devant dal schermi a fâ robis... e dispès tu scuegnis cjapâ e lâ tai uficis di persone."

◆ Sergio al è content de sielte fate – "Di cuant che o ai molât il lavôr, la mè vite e je cambiade in miôr, ancje se lis jentradis a son chês che a son; cumò mi stoi movint par zontâ gnovis ativitâts (manutenzions di stradis, il laboratori pe lavorazion da cjar...). O soi content che ancje i miei fis si stan apassionant."

Vie Doman e promet alc di bon! ■

## ART TAL TAC

## Popcorner e il Pop ladin: la musiche che e ten vive une lenghe

Maira Pezzetta



Ovin cognossût i *Popcorner* a *SUNS Europe* di Udin, il festival european des arts performativis in lenghe minoritarie che ogni an al trasforme la citât intune crosera di lenghis e musicis impensabilis. A jerin sul palc dal Teatri Gnûf Giovanni da Udine siet fantats de basse Val di Fassa cu la lôr tiere intor e in bocje une lenghe che pôcs, fûr des Dolomitis, a cognossin. Chi di un pôc ju tornarès a sinti su *Radio Onde Furlane*, e tai mès che a vegnin ju viodarès a zirâ pal Friûl.

◆ *Popcorner*: in ladin fassan, Pop al vûl di frut, ma al fâs pensâ

ancje al gjenar musicâl (pop, come populâr). *Corner* al è il vagabont, chel che no sta fer. Un non che al è za un manifest: zovins de mont che a torzeonin tra lenghis, gjenars e tradizions, e a tornin simpri a cjase.

◆ Il grup al nas tal 2019 drenti di *Cianton da Maravea*, un progjet musicâl des cooperativis sociâls *INOUT* de Val di Fassa. Siet components: Sabrina, Mery e Melany aes vòs, Daniele aes tastieris, Gianpaolo ae ghitare, Tommaso ae batarie, Nicolò al bas. Un biel misliçot, dulà che ducj a àn formazions diversis: cui

che al ven dal conservatori, cui dal còr dal borc. Sul palc a vuelin ancje puartâ il costum tradizional ladin, reinterpretât e modernizât: la tradizion, par lôr, no je un toc di museu. E je une stofe che si pues simpri tornâ a meti.

◆ Scrivi in ladin no je une robe semplice, ancje par cui che al è cressût cun cheste lenghe. Il ladin standard al esist dome su la cjarte; lôr a fevelin la variante de basse Val di Fassa, e ogni test lu scrivin propit cun cheste variante fasint une sielte precise e lassant un segn impuartant pal avignî de lôr lenghe. «In ladin no esist une peraule par di felicitât. Si àn di doprâ altris imagjins, altris zîrs di peraulis. E je une lote personal cuntri dal dizionari.»

◆ Tal Jugn dal 2025 al è saltât fûr "Utar Piata" (voltâ pagjine) il lôr prin album. A *SUNS* a àn presentât "Melanconia" e "Tie Soreie" devant di plui di mil personis. Al jere il lôr prin grant palc internazional, e a àn tignût dîr. Dal festival a son tornâts cu energjii gnovis e pussibii invîts a festivali europeans, ma ancje une pussibile colaborazion cun Lia Sampai, la cjantante catalane che e à vinçût *SUNS*, cjapant il premi dal public e de jurie.

◆ A *SUNS* a àn ancje scoltât, osservât, si son confrontâts. «O vin capît cetantis stradis diferentis che a esistin par tignî vive une lenghe.» L'incuintri cu la realtât furlane ju à stocâts: «tantis someancis, une lenghe siore, une comunitât che e crôt, e la fadie di rivâ ai zovins.»

Za in passât a àn sunât in Sardegne cui sarts e in Pulie pe comunitât greghe; chest Invier a àn dividût il palc cu lis *Aganes*, grup di feminis che al cjante par ladin badiot ma che al lavore soredu in Gjermanie. «Come se no vessin spazi a cjase lôr.»

◆ L'Istât si jemple di events cui *Popcorner*: tal mès di Avost al festival *Il mosaico delle minoranze* a Forlì, dopo il *Festival Circens Dolomites*, là che musiche ladine e çoncolarie si cjatin su lis Dolomitis. Intant a pensin a preparâ un videoclip, une ristampe dal album, e dôs ritradis di scritture che a fasaran in Val Badie e sul Lâc di Ledro, il puest dal cûr là che a son nassudis lis primis cjançons.

◆ «Se no sin nô zovins a fâlu, cui puedial?» La lenghe ladine lôr le vivin come une robe naturâl. Si fevele cui amis, in famee, e scrivi cjançons al è vignût sù di bessôl. «Midiant de musiche, che e je un lengaç universal, tu puedis rivâ a ducj.» A cui che in Friûl al stes ancjemò pensant se al valeve la pene di cjantâ in marilenghe, i *Popcorner* a disaressin: «Fasilu. Al è amôr pe tô tiere, pe tô storie. Un patrimoni grandissim. No stâ a lassâlu cjapâ polvar.»

◆ Par cognossi di plui la lôr lenghe e la lôr musiche: scoltait "Utar Piata" su dutis lis platformis digjitalis e stait daûrai *Popcorners* su Instagram, o contatâtju a [popcornerchiveri@gmail.com](mailto:popcornerchiveri@gmail.com). Parcè che cjantâ in marilenghe, ancje in Friûl, al è un at di amôr che al merete sostignût. ■

---

**Par viodi chei altris contignûts  
de “La Patrie dal Friûl”,**

abonaitsi. Dutis lis informazions si cjatin sul sît  
**www.lapatriedalfriul.org**



**Per vedere gli altri contenuti  
de “La Patrie dal Friûl”,**

abbonatevi. Tutte le informazioni si trovano sul sito  
**www.lapatriedalfriul.org**

Che tu sedis za abonât o che tu le vedis lete dome cualchi volte,  
aboniti o rinove l'abonament a un mensîl unic:

**almancul une volte al mês, lei par furlan!**

